

【五逆】（科註第一四六頁倒數第二行）

《佛學大辭典》「五逆輕重」：（雜語）大乘義章七曰：「殺父最輕，殺母次重，殺阿羅漢次重，出佛身血次重，破和合僧最重。故成實云破僧最重，何故如是？離三寶故。」〔中略〕可入聖者，不得入聖。坐禪學問，讀誦禮拜，如是等事，一切不得，所以最重。」

【十惡】（科註第一四六頁倒數第二行）

《三藏法數》：「出法界次第」惡即乖理之行。謂眾生觸境顛倒，縱此惑情，於身口意，動與理乖，成此十惡也。

一、殺生：殺生者，謂自殺，亦教人殺，斷害一切眾生之物命也。

二、偷盜：偷盜者，謂竊取他人財物也。

三、邪淫：邪淫者，謂非己妻妾，而行欲事也。

四、妄語：妄語者，謂好造虛言誑惑他人也。

五、兩舌：兩舌者，謂向此說是，向彼說非；或向彼說此，向此說彼，而使彼此乖諍也。

六、惡口：惡口者，謂言語粗獷，毀辱他人，令其受惱也。

七、綺語：綺語者，謂乖背真實，巧飾言辭，令人好樂也。

八、貪欲：貪欲者，謂於順情之境，貪著樂欲，心無厭足也。

九、瞋恚：瞋恚者，謂於違情之境，不順己意，心生忿怒也。

十、邪見：邪見者，謂撥無因果，行邪見道，心無正信也。